

## ■ ORD LA VITA DA LUDMILLA CAHENZLI

# Ludmilla è euforica e zinica pervi da la politica da famiglia

DA LUDMILLA CAHENZLI

**B**ainvegna en il 21avel tschientaner, pens'jau durant leger la gasetta. Pascal Couchepin ha fatg progress. En in hugl è el sigli dal temp medieval direct en noss tschientaner. Cun sia nova politica da famiglia pretenda el temps da bloc en tuttas scolas svizas. Jau, Ludmilla Cahenzli, ma legr enorm. Malgrà ch'jau stuess atgnamain far prescha ed ir a lavurar (igl è las 9.00, mia figlia è gist ida a scola, e da las 11.00 turna mes figl. E mes bambinis vulan adina ch'insatgi saja a chasa cura ch'els turnan) legel jau vinavant la gasetta.

**C**ouchepin vul laschar ir ils uffants gia cun tschintg u sis onns a scola. Quai n'è betg tenor mes gusto. Ma i na vegn strusch a far donn. Ils scolasts ston simplamain sa disar ch'ils pitschens emprendan l'entschatta anc pli plaun.

**M**a l'idea da stgaffir ina conferenza dals directurs chantunals da famiglia ma plascha puspè. Forsa unifitgeschan quests

directurs lura finalmain ils plans d'instrucziun dals differents chantuns. Per ina famiglia che mida chasa e va en in auter chantun èsi gea adina ina murdraria. U ch'ils uffants ston repeter ina classa perquai ch'ils conscolars en l'auter chantun èn gia bler pli avanzads en franzos. Ni ch'ins saja uras supplementaras da vegnir blau per ch'ils uffants possian lavurar suenter matematica che vegn instrui en il nov chantun bler pli svelt.

**U**schiglio na legel jau ord princip mai a fin in artitgel en la gasetta. Ma las ideas da Couchepin ma mettan en ina tala euforia ch'jau emblid tut mes princips e legel vinavant. A la fin stà anc scrit: «En la media ha mintga dunna svizra ozendi 1,4 uffants. Oz resta bunamain mintga tschintgavla dunna senz'uffants, etc.» In pitschen mument sun jau stutta. Insatge na constat qua betg. Ma tge èsi? Ma cler. Ils mastgels. Nua èn atgnamain ils mastgels? U na dovri forsà betg pli mastgels, pardon umens, per avair uffants? Appartegnan ils uffants propi be pli a las dunnas?

N'han ils umens nagins uffants? U è la politica da famiglia dal bun Pascal Couchepin schon uschè avanzada ch'i na dovra nagins umens pli per far pops. Jau hai pensà che quai giaja anc dus u trais tschientaners fin ch'ins vegnia da fabritgar semenza artificiale per remplazzar ils umens. «Ludmilla, na sajas betg zinica!» m'avertescha jau. «Quai na porta nagut. Ins na po betg pretender memia bler da Couchepin. Fin ch'ina regenza svizra vesa en ch'ils uffants appartegnan era als umens e fin che quai sa manifestescha era en las statisticas, vai anc dus u trais tschientaners. E forsà dovri lura halt era betg pli ils umens (guarda sura).»

**I**n politicher ha ina giada ditg: «Sche l'educaziun dals uffants fiss chausa dals umens, fiss gia daditg introduci il temp da bloc en scola. I dess canortas e scolas dal di. Jau, Ludmilla Cahenzli, vom d'accord cun quest politicher e less anc aschuntar: I dess lura segir era sper mintga plazza da giugar ina flotta ustaria nua ch'ins po baiver patgific ina gervosa u in café.

«Ergo Ludmilla. Tge emendas ti uss da questa lecziun?» ma dumond jau.

«Jau emprend ch'ins sto surlaschar als umens dapli responsabladad en l'educaziun dals uffants», respund jau a mamezza. «E co fas ti quai?» ma dumond jau.

«Jau telefonesch ad Eugen Cahenzli ch'el stoppia vegnir oz da mezdi a chasa a far gentar. Igl è gea gia las 10.00. Fin ch'jau sun en biro èsi las 11.30, e lura stuess jau gist puspè turnar a chasa a far gentar. La finala hai jau gia fatg solver oz per noss uffants. Lura po Eugen bain surpigliar il gentar.»

«Fitg bun'idea Ludmilla!» ma ditg jau.

**J**au telefonesch ad Eugen. Eugen n'è betg en biro.

**F**orsà han las statisticas tuttina fraschun, pens jau resignada. Ed il detagl cun la semenza è probabel irrelevant.

**D**uai jau uss anc ir dabot en biro? E tge fatsch jau gentar?